

**Vojna baza
Dubrave
kod Tuzle**

Pješadini ispraćeni u Afganistan

● U misiji podrške miru ISAF sudjelovaće 45 pripadnika 5. pješadijske brigade OSBiH, među kojima i jedna žena ● Prva rotacija čuvaće dvije baze danskih vojnika u pokrajini Helmand

Prva rotacija pješadijske jedinice Oružanih snaga Bosne i Hercegovine multinacionalnog sastava jučer je iz vojne baze Dubrave kod Tuzle svečano ispraćena u misiju podrške miru ISAF u Islamskoj Republici Afganistan.

Na ovaj zadatak, u prisustvu članova porodica, visokih dužnosnika Ministarstva odbrane i Oružanih snaga BiH, dužnosnika NATO-a, EUFOR-a, Ambasade Danske u BiH i vojno-diplomatskih predstavnika država akreditovanih u našoj zemlji, krenulo je 45 pripadnika 5. pješadijske brigade OSBiH, među kojima je i jedna žena.

Korak ka NATO-u

Oni će u Afganistanu biti u sastavu danskog kontingenta, a osiguravaće bazu u opasnoj pokrajini Helmand. Tamo će provesti šest mjeseci, nakon čega slijedi odlazak druge rotacije. Odluka Predsjedništva BiH da pošalje jedinicu u misiju ISAF, koja se od 2003. odvija pod vodstvom NATO-a (prije toga to je bio UN) i čiji je cilj pomoći afganistanskoj vladi u stvaranju sigurnih uslova za obnovu i u širenju centralne vlasti na cjelokupni teritorij zemlje, jedan je od najkonkretnijih koraka koji je BiH učinila na putu ka punopravnom članstvu u Sjevernoatlantskom savezu.

Komandant 5. pješadijske bri-



Spremni za opasnu zadaću

Foto: A. KAJMOVIĆ

gade OSBiH, brigadni general Senad Mašović, kaže da će jedinica raditi isključivo na unutrašnjem obezbjeđenju dvije baze danske borbene grupe.

- Dosadašnji pokazatelji u Afganistanu govore da je ubjedljivo najmanji broj napada na baze. Incidenti se, uglavnom, dešavaju prilikom izlazaka iz baza, kazao je Mašović, napomenuvši da će naša jedinica biti suočena s nižim stepenom rizika u poređenju sa ostalim sudionicima misije.

General Mašović je podsjetio da su pripreme jedinice počele u oktobru 2008. izborom kandidata i razvijanjem programa i paketa podrške obuci. Sadržaj obuke je u cijelosti bio prilagođen principima, koji su kompatibilni sa standardima oružanih snaga zemalja članica NATO-a.

- Nakon predsjedničke odluke o upućivanju pješadijske jedinice OSBiH u sastav danskog kontingenta, kao njena kruna izvedena je evolucijska vježba. Stručni tim OS Kraljevine Dan-

ske i komande 5. pješadijske brigade izvršio je završno ocjenjivanje osposobljenosti jedinice za misiju. Tako su 73 pripadnika pješadijske jedinice ocijenjena "da su u potpunosti dostigli potrebne standarde za izvršenje ove zahtjevne misije", kazao je Mašović.

Načelnik Zajedničkog štaba OSBiH general-pukovnik Miladin Milojević je rekao da OS i država BiH, slanjem jedinice u Afganistan, pokazuju spremnost u održavanju kontinuiteta

Knjiženje imovine

Zamjenica ministra odbrane Marina Pendeš je podsjetila na preostali uvjet da BiH započne prvi godišnji ciklus iz Akcionog plana za članstvo u NATO-u (MAP). Nakon što je odlučeno da BiH uputi jedinicu u Afganistan i uništi viškove naoružanja i municije, preostalo je knjiženje 69 lokacija sa perspektivnom nepokretnom vojnom imovinom na državu.

- Vjerujem da će nakon utemeljenja i formiranja novog saziva Vijeća ministara i taj problem biti prevaziđen, kazala je ona.

učesća u operacijama kolektivne bezbjednosti i opredijeljenost za euroatlantske integracione procese.

Dnevnicu 115 eura

- Gospodo oficiri, podoficiri i vojnici, od vas se očekuje da tokom izvršavanja ove misije primijenite i pokažete stečena znanja i sposobnosti sa obuke, iskažete visok stepen profesionalizma i da svojim ukupnim ponašanjem prezentujete spremnost OSBiH da, rame uz rame, zajedno učestvuje u dodijeljenim misijama s ostalim pripadnicima Koalicijskih snaga u Afganistanu, kazao je general Milojević.

Sve finansijske obaveze pješadijske jedinice finansiraju se iz budžeta BiH. Tokom boravka u Afganistanu njeni pripadnici će primati redovnu platu u BiH (oko 1.000 maraka) i dnevnicu od 100 do 115 eura.

Daniel OMERAGIĆ

OSBiH



Saradnja evropskih armija

Zamjenik načelnika Zajedničkog štaba OSBiH za operacije, general-major Rizvo Pleh, učestvovao je na 18. godišnjoj konferenciji evropskih armija, koja je održana u Sibiu, Rumunija, pod pokroviteljstvom OSSAD-a za Evropu i kopnenih OS Rumunije. Tema je bila: Izgradnja savezničkih snaga kroz multinacionalnu obuku, a učesnici konferencije bili su načelnici štabova i načelnici kopnenih snaga više od 42 zemlje, uključujući zemlje NATO-a i zemlje učesnice PFT-a. Razgovarano je i o tekućim vojnim pitanjima koja se odnose na aktivnosti i mogućnosti kopnenih oružanih snaga u Evropi i evroaziji.


Sulejman Tihić



Ne dozvoliti majorizaciju naroda

Predsjednik SDA Sulejman Tihić posjetio je redakciju časopisa Svjetlo riječi koji izlazi u okviru aktivnosti Franjevačke provincije Bosna srebrena. S aktivnostima Franjevačke provincije Tihića su, između ostalih, upoznali glavni urednik časopisa fra Ivan Šarčević, te Ivan Lovrenović i Enver Kazaz. Domaćini su posjetu označili veoma bitnom u procesu razvijanja dijaloga i izgradnje otvorenog društva i interesirali se za rješavanje tzv. hrvatskog pitanja u provođenju izbornih rezultata. Tihić je naglasio da se u BiH sve treba rješavati dijalogom, te da se ne smije dozvoliti majorizacija brojnijeg naroda.

Hido Bišćević



Politika otežava digitalizaciju

Generalni sekretar Vijeća za regionalnu saradnju (RCC) Hido Bišćević izjavio je da značajan broj zemalja jugoistočne Evrope zaoštaje u digitalizaciji javnih servisa zbog nedostatka adekvatnog zakonodavstva i finansijskih sredstava. "Politika dodatno otežava taj proces", dodao je. Na konferenciji za novinare po završetku dvodnevne međunarodne konferencije posvećene prevazilaženju digitalne podijeljenosti Evrope Bišćević je upozorio da digitalni jaz može imati negativan uticaj na prilike u regiji. Dogovoreno je da se RCC i Evropska radiodifuzna unija obrate EU, kako bi se pomogao proces digitalizacije.

Rijaset IZ-a u BiH



Neutemeljene Tihićeve kvalifikacije

Sulejman Tihić, predsjednik SDA, u posljednje vrijeme iznio je više kvalifikacija i ocjena o IZ-u u BiH, koje IZ smatra neutemeljenim i štetnim po ukupne interese muslimana Bošnjaka, kaže se u saopćenju Rijasetu IZ-a u BiH. Narod zna da IZ nije učestvovao na izborima, nego je Tihić predvodio SDA u izbornom procesu. Njegova tvrdnja da je pobijedio nekoga ko uopće nije učestvovao na izborima lišena je bilo kakve relevantnosti. Tihićeve izjave mogu se razumjeti kao nastavak konfrontacije s IZ-om i nastavkom politike koja je okrenuta ka obračunu unutar bošnjačkog naroda.